

Tigummigallakkat eqqartuussallu politiit isertitsiviiniittut pillugit nalunaarut

Isertitsivimmi inissitatut pineqaatissiisummik naammassinninnaasarneq pillugu nalunaarummi nr. 1173, 7. december 2009-meersumi § 4, aamma tigummigallakkat pillugit nalunaarummi nr. 1176, 7. december 2009-meersumi § 81 naapertorlugit aalajangersarneqarput:

Kapitali 1

Nalunaarutip atuuffii

§ 1. Nalunaarut manna atuutissaq tigummigallakkanut eqqartuussanullu politiit isertitsiviiniittunut.

Kapitali 2

Inissiineq nuussinerlu

§ 2. Tigummigallakkat pisuni immikkut ittuni sivikitsumik isertitsivimmiitinneqarsinnaapput. Inissiineq pissaq politeeqarfimmi pinerlunnermik suliasap suliarineqarfissaani. Inissiineq aamma politeeqarfimmut allamut nuussineq pisinnaapput assersuutigalugu

- 1) paasiniaanissaq pissutigalugu,
- 2) inissiivissanut tunngasut pissutigalugit,
- 3) isumannaatsuunissamut tunngasut pissutigalugit,
- 4) peqqissutsimut tunngasut pissutigalugit, imaluunniit
- 5) pisaq politeeqarfimmi inissiiviusussaagaluami sulisuusut ilaannik ilaquaqarpat.

Imm. 2. Eqqartuussat qaqutigoortumik sivikitsumillu isertitsivinni inissinneqarsinnaapput.

Imm. 3. Politeeqarfimmi inissiisarfilinni, tigummigallagaq imaluunniit eqqartuussaq inissiisarfimmut nuunneqartassaaq tigummigallagassanngornermiit imaluunniit eqqartuussaanermiit ulloq unnuarlu qaangiutsinagit.

Imm. 4. Politeeqarfimmi inissiisarfeqanngitsuni, tigummigallagaq eqqartuussarluunniit inissiisarfimmut nuunneqartassaaq tigummigallagassanngornermiit imaluunniit eqqartuussaanermiit kingusinnerpaamik ullut 14-it qaangiutsinnagit.

Imm. 5. Politimesterip ataasiakkaat naliliiffigereerlugit qaqutigut aalajangersinnaavaa, piffissat imm. 3-mi 4-milu taaneqartut sinnerneqarsinnaasut,

- 1) pisuni immikkut ittuni paasiniaanerup tamanna pisariaqartissappagu, imaluunniit
- 2) angallannermut silamullu tunngassutillit pisariaqartissappassuk isertitsisarfimmiinnerup imm. 3-mi 4-milu taaneqartutut piffissarititaasumit sivisunerutinnissaa.

§ 3. Politimesteri aalajangiisnaavoq tigummigallakkat isertitsisarfimmi inissinnissaat pillugu.

Imm. 2. Pinerluttunik Isumaginnittoqarfiup Pisortaata politiinut isumaqatigiissuteqarnikkut aalajangissavaa inissiisarfimmi inissiinissamik pineqaatissiisut piffissami sivikitsumi isertitsisarfimmi naammassiniarneqarsinnaasoq.

Imm. 3. Tigummigallakkap imaluunniit eqqartuussap inissiisarfimmi inissinnissaa Pinerluttunik Isumaginnittoqarfiup Pisortaanut taamatulluunniit pisinnaatitaasumut isumaqatigiissuteqarnikkut aalajangiiffigineqassaaq.

§ 4. Nuussisoqarnissaa tikillugu tigummigallakkat eqqartuussallu illoqarfinni pinerluttunik isumaginnittoqarfiup ataavartussatut inissiisarfeqarfiini aamma inissiisarfiup pisortaa isumaqatigiissuteqarfigereerlugu sapinngisamik isertitsisarfimmi ulluunerani piffissami annertuumi inissiisarfimmiittassapput. Taamaassanngilarli tigummigallakkanik ulluunerani inissiisarfimmiitsitsinissaq siunertarisanut akerliussappat.

§ 5. Tigummigallakkap imaluunniit eqqartuussap qaqugu isertitsisarfimmiitinneqarnissaa allattaavinnut eqqaamasassiarineqassaaq.

Kapitali 3

Isertitsisarfimmiinnermi pisinnaatitaaffiit pisussaaffillu

Ilitsersuut

§ 6. Parnaarussaq isertitsisarfimmi inissinneqareerniarpat pisinnaatitaaffiit, pisussaaffiit pillugit aamma tassaniinnermi allatigut iliuusissat pillugit sulisunit ilitsersorneqassaaq.

Isertitanut pissusilersorneq

§ 7. Parnaarussat inussiarnersumik qajassuartumillu pissusilersorfigineqassapput eqqartuussisarnermillu inatsimmi imaluunniit pinerluttulerinermik inatsimmi tunngavigisassanit allaanerusunik pissusilersorfigineqassanatik.

§ 8. Tigummigallakkanut eqqartuussiviup aalajangigaa malillugu kisimiitillugit immikkoortitanut naleqqiullugu sulisuusut pisussaapput akuttunngitsunik paasiniartassallugu pineqartut sulisunut attaveqarfiginninnisamik, nakorsamit, ilanngullugu tarnikkut pissutsinut nakorsamit, nakkutigineqarnissamik, pulaarneqarsinnaatitaanerup il. il. annertusineqarnissaanik pisariaqartitsinersut immikkut artukkiissutissat aamma tarnikkut peqqissutsimik ajoqusiisinnaaneq kisimiititatu immikkoortitaanermut attuumassuteqartut annikillilerniarlugit. Pingaartumik kisimiititatu immikkoortillugit siviuserusumik tigummigallagassanut naleqqiullugu sulisuusut pisussaapput sianigissallugu taamatut pisariaqartitsinerup kisimiititaanerup siviussusia ilutigalugu annertunerulinnginnissaa.

Imm. 2. Tigummigallakkat 18-it inorlugit ukiullit eqqartuussiviup aalangiinera malillugu piffissami ataannartumi sapaatit akunnerinik 4-nik siviuserusumik kisimiititaasimasut aamma tigummigallakkat 18-inik sinnerlugilluunniit ukiullit eqqartuussiviup aalangiinera malillugu piffissami ataannartumi qaammatinit 3-nit siviuserusumi kisimiititaallutik immikkoortitaasimasut pineqartut saniatigut inunnut attaveqarfeqarsinnaalernissaat aallartisarneqassaaq minnerpaamik ullormut nal.akunnerini 3-ni.

Imm. 3. Politiit sapaatip akunneranut ataasiarlutik tigummigallagaq suleqatigalugu taassuma imm. 2 naaportorlugu allanut attaveqarfeqalersinnaanera pillugu pilersarusiussapput.

Innersuussutit

§ 9. Parnaarussap innersuussutit isertitsisarfiup sulisuunit isertitsisarfimmi suliassanik isumaginninnissamat atasut malitassarai.

Eqqissisimaneq torersaarnerlu il.il.

§ 10. Parnaarussat eqqissisimanissaq torersaarnerlu mianerissavaat sulisunullu inussiarnersumik pissusilersussapput.

Imm. 2. Parnaarussat pisussaapput isertitsiviup initaa isersimatitaaffitsik eqqiartassallugu. Eqqiaanissamut atortussat isertitsisarfiup atugassiissutigissavai.

Imm. 3. Parnaarussat isertitsisarfiup initaani pujortassanngillat.

Pequtit

§ 11. Parnaarussaq neqeroorfigineqassaaq isertitsisarfiup initaata pertiterlugit piiariaannartut siniffimmik, nerrivimmik issiavimmillu pequsernissaanik, tamatumunnga isumannaatsuunissamut tunngasut akerliussanngippata.

Peqatigiissinnaaneq ininullu allanut isersinnaatitaaneq

§ 12. Parnaarussat, pinsinnaasaq naapertorlugu, parnaarussanik allanik peqateqarsinnaatitaapput.

Imm. 2. Eqqartuusap isumannaatsuunissaa aarlerinartorsiortinneqassanngippat isertitsisarfiup initaanut matu ammatinneqartarsinnaavoq nal. 08.00-imiit nal. 00.00-imut, taamaalilluni eqqartuussaq perusersartarfimmut, uffartarfimmut immaqalu isersimaartarfimmut isersinnaaqqullugu.

Imm. 3. Imm. 2 taamatulli atuutinneqassaaq tigummigallakkanut tamanna tigummigallarnernermi siunertarisanut akerliussanngippat.

Pialuutit

§ 13. Parnaarussat politiinut isumaqatigiissuteqarnikkut, aamma inimi pissutsit tamanna ajornartissanngippassuk, isertitsisarfimiinnissamut namminerisatut pialuutiminnik nassataqarsinnaapput.

Nerisaqartitaaneq

§ 14. Parnaarussat pinsinnaatitaapput ullormut pingasoriarlutik nerisaqartitaanissamut.

Silaannarissarneq

§ 15. Parnaarussat pinsinnaatitaapput ullut tamaasa minnerpaamik nal. ak. ataatsimi silaannarissartarnissamut, taamaattoq tak. imm. 2.

Imm. 2. Isumannaatsuutitsinissaq eqqarsaatigalugu tamanna politiit isumaginninnerannut qaqutigoortumik naapertuutissappat silaannarissartarnissaq sivikillineqarsinnaavoq.

Imm. 3. 15-17-inik ukiullit sapinngisaq naapertorlugu ullormut nal. ak. marlunni timigissartinneqartassapput, taakkunanga nal.ak. ataaseq silami, taamaattoq tak. imm. 2.

Isumaginninnikkut ikiorneqarneq

§ 16. Pinerluttunik Isumaginnittoqarfik politiit attavigissavaat parnaarussanut, sap. ak.1 sinnerlugu isertitsisarfimiittussanut, isumaginninnikkut ikiuunnissaq siunertaralugu.

Peqqinnissakkut ikiorneqarneq il.il.

§ 17. Parnaarussat pisinnaatitaapput nakorsamit aamma peqqinnissakkut allatigut ikiorneqarnissamut.

§ 18. Pasitsaanneqarpat tigummigallagaq eqqartuussarluunniit napparsimasoq imaluunniit ajoqusersimasoq, isertitsisoqalersinnagu pineqartoq nakorsamut sassartinneqassaaq.

Imm. 2. Isertitsisarfirmut isertitserneernikkut parnaarussap napparsimanera imaluunniit ajoqusersimanera pasitsaanneqarpat ingerlaannaq nakorsamut sassartinneqassaaq.

§ 19. Pasitsaanneqarpat tigummigallagaq imaluunniit eqqartuussaq imminoriarsinnaasoq isertitsisoqalersinnagu pineqartoq nakorsamut sassartinneqassaaq isertitsisarfirmiinnissaata isumannaatsuunissakkut illersorneqarnissaa naliliiffiginarlugu.

Imm. 2. Isertitsisarfirmut isertitserneernikkut pasitsaanneqarpat isertitaq imminoriarsinnaasoq ingerlaannaq nakorsamut sassartinneqassaaq.

§ 20. Illoqarfimmi nakorsaqaangippat §§ 18 aamma 19 malillugit qanorluunniit pisoqassagaluarpat peqqissaasumut allamulluunniit peqqinnissaqarfiup sinniisuanut sassartitsisoqarsinnaavoq.

Sulineq ilinniagaqarnerlu il. il.

§ 21. Tigummigallagaq pisinnaatitaassaaq nammineq suliffissarsiornissamut, isertitsisarfirmi ingerlanneqarsinnaalluartumik. Tigummigallakkamut suliffissamik neqerooruteqarnissamut periarfissaqarpat pineqartoq akissarsisinnegartassaaq pinerluttunik isumaginnittoqarfiup suliffeqarfiini sulineq ilinniagaqarnerlu il. il. pillugit nalunaarummi nr. 1156, 7. december 2009-meersumi (suliffeqarnermik nalunaarut) malittarisassat malillugit.

§ 22. Eqqartuussat pisinnaatitaallutillu pisussaapput suliffeqarnermik nalunaarummi malittarisassat malillugit suliassaqartitaanissamut.

Kapitali 4

Aneersinnaatitaaneq

Tigummigallakkat aneersinnaatitaanerat

§ 23. Eqqartuussisarnermik inatsimmi § 379, imm. 2, aamma §§ 23-28-mi malittarisassat malillugit politiit tigummigallagaq piffissami sivikitsumi aneersinnaanissamut akuerisinnaavaat.

Imm. 2. Aalajangiineq politiit aalajangiinerissavaat.

§ 24. Tigummigallakkat siunertanut immikkut ittunut anisinnaatitaapput, s.ass.

- 1) inuk qanigisaq, napparsimaruluttoq pulaarniarlugu,
- 2) inuup qanigisap ilisaanera najuuffiginarlugu, imaluunniit
- 3) nammineq inuttut soqutigisat isumaginiarlugit pissutsit tamatumunnga immikkut pisariaqartitsissappata.

Imm. 2. Anisinnaatitaanermut nalinginnaasumik patsisissaassaaq tigummigallakkap pissutsit anigallarnissamut pissutaasut pisariaqarneratut uppernarsaatissaqartissagai.

§ 25. Aalajangiinermi atonerlueriataarsinnaaneq eqqarsaatigineqassaaq. Immikkut pingaartinneqassapput tigummigallagaq

- 1) pasisaappat imaluunniit siornatigut pinerluut ulorianartoq pillugu eqqartuussaareersimappat, ilanngullugit toqutsineq, piaaraluneernikkut ikuallatsitsineq, persuttaanikkut- imaluunniit kinguaassiuutitigut atonerluinikkut pinerluuteqarsimaneq imaluunniimmi inatsisinik immikkut imaannangissusilimmik, akissarsiutitut pissusilimmik, unioqquutitsisareersimappat.
- 2) tigummigallarnernermini qimaareersimappat imaluunniit tamatumingga misileereersimappat,
- 3) tigummigallarnernermini pinerluuteqarsimappat,
- 4) tigummigallarnernermini anigallarnissamut akuerineqarnini atonerlussimappagu, imaluunniit
- 5) pineqaatissiisummik siornatigut naammassinninniaarnermini nr. 2-4-mi taaneqartut iliuseqareersimappat, kingusinnerusukkut ingiallorteqarani aninissamut patsisissaatitat eqquutsinnagit.

§ 26. Anisinnaatitaaneq piffissamut sivikitsuinnarmut tunngasuussaaq. Anisinnaatitaaneq siunertarisani pineqartuniit sivisunerutinneqarsinnaanngilaq, nalinginnaasumillu piffissap angalaffiusup saniatigut ulloq ataaseq sinnissanagu.

Imm. 2. Anisinnaatitaaneq ullormit ataatsimiit sivisunerutinneqassappat, unnuinissaq politiit isertitsisarfianni imaluunniit parnaarussivimmi pissaaq. Tamatumingga siuningaaniit isumaqatigiissuteqartuussapput politiit isertitsisarfiat imaluunniit parnaarussivik pineqartoq.

§ 27. Anisinnaatitaanermut akuersissutit aamma aalajangersakkanik patsisissalernerneqassaaq, anisinaanissamut akuersissummik atonerluinissaq pinngitsoorniarlugu nalequttuosorinartunik, ilanngullugit tigummigallagaq

- 1) sulisuusunit ingiallorneqassasoq, tak. imm. 2,
- 2) anigallarnini tamakkerlugu aalakoornartortussanngitsaq, imaluunniit
- 3) utimut takkunermi imigassartorsimaneq pillugu misiligaanerni peqataassasoq.

Imm. 2. anisinnaatitaaneq ingiallorteqartitsinikkut imaluunniit ingiallorneqanngitsumik pissanersoq pillugu aalajangiiniarnermi anisinnaatitaanermi siunertarisat aamma atonerlueriataarsinnaaneq pingaartillugit eqqaamaneqassapput. Tunngaviusoq tassaassaaq anisinnaatitaanerup ingiallorteqarnikkut pinissaa.

§ 28. Angalanermi, uninngaarnermi kaasarfimmiussanullu aningaasartuutit tigummigallakkap akilissavai.

Eqqartuussat aneersinnaatitaanerat

§ 29. Eqqartuussat aneersinnaatitaassapput pinerluttulerinermik inatsimmi § 214-imi aamma pinerluttunik isumaginnittoqarfiup isertitsiviini parnaarussat aneersinnaatitaanerat pillugu nalunaarummi nr. 1157, 7. december 2009-meersumi (aneersinnaatitaanermik nalunaarut) malittarisassat malillugit.

Kapitali 5

Pulaarnej il. il.

Tigummillakkanut pulaarnej il. il.

§ 30. Tigummigallagaq §§ 31-45 naapertorlugit killilimmik pisinnaatitaavoq, unnuisitsisarfirmi torersaarnissamik isumannaatsuunissamillu piuinartitsinissaq pissutigalugu allanik pissutissaqanngippat, pulaarteqartarnissamut. Tigummigallagaq tamatigut pisinnaatitaaffeqarpoq illersuisuminit pulaarnejartarnissamut nakkutigineqanngitsumik, tak. eqqartuussisarnermik inatsimmi § 379, imm.1. oqaaseqatigiit kingulliit.

Imm. 2. Tigummigallagaq periarfissaqartitaassaaq tigummineqalernerminiit sapinngisamik piaarnerpaamik qaniginerpaasaminut §§ 31-45 malillugit pulaarsinnaanerini kalerriinissamut.

Imm. 3. Politiit aalajangissavaat tigummigallagaq nammineerluni qanigisaminut kalerriissanersoq imaluunniit tamanna politiinit isumagineqassanersoq.

Imm. 4. Politiit pulaarteqartarnerit qanoq ingerlannissaat pillugu erseqqinnerusunik aalajangersaasinnaapput.

§ 31. Tigummigallakkap pulaarteqartarnissaa politiinit akerliuffigineqarsinnaavoq, tamatumunnga tigummigallakkap siunertarisai tunngavigineqartariaqassappata. Pulaarnejarnissaq politiinit itigartitsissutaappat, tigummigallakkap piumasarisinnaavaa itigartitsineq eqqartuussisunut aalangiiffigisassanngortitaassasoq, tak. eqqartuussisarnermik inatsimmi § 379, imm. 1.

§ 32. Politiit, sumiiffinni ataasiakkaani pissutsit tunngavigalugit aamma torersaarnissakkut isumannaatsuunissalluunniit tamanna pisariaqartissappagu, inuit amerlassusissaasa tungaasigut killiliissutissanik aalajangersaasinnaapput, peqatigisaanik

- 1) tigummigallakkamut pulaartissat akuerisaasinnaanissaat, aamma
- 2) tigummigallakkamut pulaarsinnaanissaat pillugit.

§ 33. Pulaarnerup sivisussusia nal.akunnerata affaaniit sivikinnerussanngilaq. Sivisunerusumik pulaarnissat pissutsit naapertuutigalugit akuerineqartarsinnaavoq.

Imm. 2. Tigummigallakkat eqqartuussiviup aalajangigaa malillugu kisimiititatur immikkoortitaasut piffissami sivisunerusumi pulaarteqartarnissaat akuerineqarsinnaavoq.

Imm. 3. Tigummigallakkamut illersuisuusup pulaarnissaa aamma tigummigallakkap nunami allameersup nunagisap aallartitaqarfiani konsuleqarfianilu sinniisuutitamut pulaarnissaa allat pulaarsinnaatitaanerannut annikillisaataassanngilaq.

§ 34. Pulaarnissami naatsorsuutigineqassaaq pulaarniartup tigummigallakkamut pulaarnissaq politiinit akuersisitsiniaareersimanissaa.

Imm. 2. Tigummigallakkamut pulaarnissaq akuersissutigineqalersinnagu pulaarumalluni qinnuteqartoq pillugu Pinerluttulerinermi Nalunaarsuiffimmut nalinginnaasumik paasiniaasoqartassaaq. Tamanna pinngitsoorsinnaavoq qinnuteqartoq politiinit ilisimaarineqarpat.

Imm. 3. Pinerluttulerinermi Nalunaarsuiffimmut paasissutissarsiornissaq aatsaat pisinnaavoq qinnuteqartoq tamatumunnga allaganngukkamik isumaqataasimappat. Politiit qinnuteqartoq ilitsersussavaat pulaarnissamut akuerineqarnissami naatsorsuutaasoq pineqartup isumaqataanissaa Pinerluttulerinermi Nalunaarsuiffimmut paasissutissarsiortoqarnissaanut.

§ 35. Inuit aalajangersimasut pulaarnissaat politiinit inerteqputigineqarsinnaavoq aamma pulaarnissamut akuersissut arsaarinnissutaasinnavoq, tamanna pisuni ataasiakkaani torersaarnissap isumannaatsuunissallu attatiinnarnissaat pissutigalugu pisariaqassappat.

Imm. 2. Pulaarnissamut akuerineqarnissamik qinnuteqaat itigartitsissutaappat, imaluunniit pulaarnissamut akuersissut arsaarinnissutaappat, tamatumunnga pissutaasut allakkiarinqassapput.

§ 36. Politiit isertitsisarfinni ataasiakkaani pissutsit tunngavigalugit aamma torersaarnissakut isumannaatsuunissakkullu pingaartitassat pissutigalugit killilersuutinik aalajangersaasinnaapput, pulaartut sunik nassataqarsinnaanerit imaluunniit pulaarnermi sunik peqarnissaat pillugit. Politiit ilanngullugu aalajangersinnaavaat, pulaartut misissoruminaatsunik nassataqassanngitsut aamma sunilluunniit tigummigallakkanut isertitsisarfinniinnermi inerteqputaasunik.

Imm. 2. Mobiltelefonit assigisaattullu aattaveqatigiissutit atortuulu il.il. pulaarnermi nassarneqassanngillat. Taamaassanngilarli pulaartoq tigummigallakkap illersuisorippagu, illersuisuorsorluu pulaarnermut atatillugu attaveqaatit atortumik sulisunut takutitsippat immaqalu nalunaarsuisitsilluni.

Imm. 3. Politiit pulaartussanut sioqqutsisumik ilisimatitsisassapput suut pulaarnermi nassarneqannginnissaat pillugu.

§ 37. Pulaarnissamut akuersissummut patsisissaavoq pulaartup

- 1) nassataminik misissuisitsinissaa,
- 2) kinaassutsimut assitalittut ilisarnaammik nassataqarnissaa, taamaattoq tak. imm. 2, aamma
- 3) politiinit qinnuigineqarnikkut qaatigut atisaminik misissuisitsinissaaq, tak. imm. 3

Imm. 2. Pulaartup kinaassutsimut assitalittut ilisarnaammik nassataqarnissaa pillugu atugassaaitat sanioqqunneqarsinnaapput, pisuni ataasiakkaani pissutsit immikkut ittut tamatumunnga pissutaasinnaappata.

Imm. 3. Pulaartup qaatigut atisaanik misissuisoqassappat, pulaartoq sioqqutsisumik ilisimatinneqariissaaq

- 1) pulaartup akuersineratigut aatsaat misissuisoqarsinnaasoq, aamma
- 2) pineqartoq misissuiffigineqarnissamut akuersinngippat itigartitsisoqarsinnaasoq.

§ 38. Qaatigut atisanik misissuineq pissaaq pulaartup kaasarfinniuinik il. il. takutitseqqusinikkut. Misissuineq aamma ilaneqarsinnaavoq metaldetektorimik pulaartup qaatigut atisaanik misissuinerneq.

Imm. 2. Pulaartup qaatigut atisai suli annertunerusumik misissuiffigineqarsinnaapput pisuni ataasiakkaani pissutissalimmik pasitsaanneqarpat pulaartoq isertortumik eqqussaqarniartoq.

Imm. 3. Pulaartunik annertunerusumik misissuiffiginneq pisinnaavoq pulaartoq qaatigut atisaaqquneqarneratigut politiit taakkuninnga erseqqinnerusumik misissuffigininnissaat pillugu.

§ 39. Pulaartup qaatigut atisaanik annertunerusumik misissuineq inimi immikkut ittumi pissaaq inunnillu misissuiffigisassallu suiassuseqataata saniatigut allanik najuuttoqassanngilaq. Pulaartup suaassuseqataanik sulisoqanngippat misissuineq pissaaq inunnit marlunnit misissukkatulli suaassuseqanngitsunit.

Imm. 2. Misissuineq pulaartunit, tigummigallakkanit isertitanilluunniit allanit najuuffigineqassanngilaq.

Imm. 3. Misissuineq ingerlanneqassaaq pulaartumut arlaannaatigulluunniit ajuallannartunik misigiffiunngitsumik.

§ 40. Pulaartup atisai annertunerusumik misissorneqaraangata tamatumunnga pissutaasut misissuinerullu inerneru allakkierineqartassapput.

§ 41. Tigummigallaanerup siunertarisaa pissutigalugu politiit piumasarisinnaavaat pulaartoqarneq alaatsinaatoqarnikkut pissasoq, tak. eqqartuussisarnermik inatsimmi § 379, imm. 1. Tigummigallakkap piumasarisinnaavaa politiit nakkutilliineq pillugu piumasaqaataata eqqartuussivimmuut aalajangiiffigisassanngortitaanissaa, tak. eqqartuussisarnermik inatsimmi § 379, imm. 1. Tigummigallagaq tamatumunnga ilisimatinneqartassaaq.

§ 42. Politiit aalajangersinnaavaat pulaarnissaq pissasoq isertitsisarfirmi sulisunik najuuffigineqartumik, pisuni ataasiakkaani torersaarnissaq isumannaatsuunissarlup pissutigalugit tamanna pisariaqassappat.

Imm. 2. Tigummigallagaq tamatigut pisinnaatitaavoq illersuisiminik pulaarteqarnissamut nakkutigineqanngitsumik, tak. eqqartuussisarnermik inatsimmi § 379, imm. 1, oqaaseqatigiit kingullit.

Imm. 3. Isertitsivimmi sulisunit nakkutigineqartumik pulaarni piumasaqaataasinnaavoq oqaloqatigiinneq pissasoq nakkutilliisup najuuttup oqaatsit paasisinnaasai atorlugit. Pissutsit pisariaqartitsissappata oqalutsimik atuisoqarsinnaavoq.

§ 43. Pulaarneq kipitinneqarsinnaavoq pisuni ataasiakkaani torersaarnissaq imaluunniit isumannaatsuunissaq pissutigalugit tamanna pisariaqassappat.

§ 44. Meeqqanik pulaarteqarnissaq nalinginnaasumik aatsaat pisinnaavoq inersimasumik ingiallorteqartitsinikkut.

Imm. 2. Meeqqanik pulaartoqarnissaq nalinginnaasumik aatsaat pisinnaavoq angajoqqaatut oqartussaassusillip isumaqataalluni akuersineratigut. Angajoqqaajusut tamarmik ataatsimut oqartussaassuseqartillugit pisuni ataasiakkaani isumalioqqutigineqartassaaq angajoqqaat isumaqataallutik akuersisinniarneqassanersut.

§ 45. Tigummigallagaq pisinnaatitaavoq meeqqaminik suli ukioqalersimannngitsumik isertitsisarfirmi najorteqarnissamut, tigummigallagaq nammineq meeqqamik paarinnissinnaappat isertitsisarfirmilu pissutsit meeqqap tassaniikkallarnissaanut isornartoqartinneqassanngippata.

Eqqartuussaaniclut pineqaatissitanut pulaarneq il. il.

§ 46. Eqqartuussaaniclut pineqaatissitat pulaartoqartarnissamut politiinit akuerineqartussaapput.

§ 47. Politiit, sumiiffinni ataasiakkaani pissutsit tunngavigalugit aamma torersaarnissakkut isumannaatsuunissalluunniit tamanna pisariaqartissappagu, inuit amerlassusissaasa tungaasigut killiliissutissanik aalajangersaasinnaapput, peqatigisaanik

- 3) eqqartuussaaniclut pineqaatissitanut pulaartissat akuerisaasinnaanissaat, tak. § 48 aamma
- 4) eqqartuussaaniclut pineqaatissitanut pulaarsinnaanissaat pillugit.

§ 48. Inuit aalajangersimasut pulaarnissaat politiinit inerteqqutigineqarsinnaavoq aamma pulaarnissamut akuersissut arsaarinnissutaasinnavoq, tamanna pisuni ataasiakkaani torersaarnissap isumannaatsuunissallu attatiinnarnissaat pissutigalugu pisariaqassappat.

Imm. 2. Pulaarnissaq akuersissutigineqalersinnagu pulaarumalluni qinnuteqartoq pillugu Pinerluttulerinermi Nalunaarsuiffimmuut nalinginnaasumik paasiniaasoqartassaaq.

Imm. 3. Pinerluttulerinermi Nalunaarsuiffimmut paasissutissarsiornissaq aatsaat pisinnaavoq qinnuteqartoq tamatumunnga allaganngukkamik isumaqataasimappat. Politiit qinnuteqartoq ilitersussavaat pulaarnissamut akuerineqarnissami naatsorsuutaasoq pineqartup isumaqataanissaa Pinerluttulerinermi Nalunaarsuiffimmut paasissutissarsiortoqarnissaanut.

Imm. 4. Pulaarnissamut akuerineqarnissamik qinnuteqaat itigartitsissutaappat, imaluunniit pulaarnissamut akuersissut arsaarinnissutaappat, tamatumunnga pissutaasut allakkiarineqassapput.

§ 49. Pulaarnej nalinginnaasumik najuuffigineqarneq ajorpoq.

Imm. 2. Pisuni ataasiakkaani torersaarnissaq imaluunniit isumannaatsuunissaq tunngavigalugu pisariaqassappat aalajangerneqarsinnaavoq pulaarnej pissasoq sulisuusunit najuuffigineqartumik.

Imm. 3. Pulaarnej najuuffigineqassanngilaq pulaartigisaq tassaappat illersuisigisaa akuerisaq imaluunniit advokati pinerlunnermik suliassami pineqartumi isertitsivimmut isertitaanermik kinguneqartumi imaluunniit pinerlunnermik suliassami suli ingerlasumi eqqartuussamut pineqaatissitaasumut illersuisussatut toqqagaq imaluunniit eqqartuussap nammineq toqqagaa.

Imm. 4. Pulaarnerni isertitsivimmi sulisuusunit najuuffigineqartussani piumasaqaataasinnaavoq oqaloqatigiinneq ingerlanneqassasoq oqaatsit pulaarnerni najuuttuusup paasisinnaasai atorlugit. Pissutsit pisariaqartitsissappata oqalutsimik atuisoqarsinnaavoq.

§ 50. § 33,-mi, §§ 36-40-mi aamma §§ 43-45-mi aalajangersakkat taamatulli atuutissapput eqqartuussaannermi pineqaatissitanut pulaarnerni.

Kapitali 6

Allaffigeqatigiinnertit, oqarasuaatitigut oqaloqatigiinnerit il. il.

Tigummigallakkat allaffigeqatigiittarnerat

§ 51. Tigummigallagaq pisinnaatitaavoq allagarsisarnissamut allakkanillu nassitsisarnissamut §§ 52-60 naapertorlugit killiliiffigisamik.

§ 52. Allakkat, poortukkat assigisaallu tigummigallakkamut taassumangalu ingerlasut tiguneqariartinnagit imaluunniit nassiunneqariartinnagit politiinit misissorneqarsinnaapput, tak. eqqartuussisarnermik inatsimmi § 380. Allakkat politiinit sapinngisamik piaarnerpaamik tunniunneqarlutilluunniit nassiunneqartassapput, imarisaat paasiniaanermut imaluunniit isertitsivimmi torersaarnissamik isumannaatsuunissamillu attassiinnarnissamut ajoqusiinnaasutut isumaqarfiginassanngippata. Politiit allakkanik unitsitsippata unitsitsinerup attatiinnarnissaanik apeqqut ingerlaannaq eqqartuussivimmut aalajangiiffigisassanngortitaassaaq.

§ 53. Eqqartuussivik aalajangiinnigikkaluartoq politiit tigummigallakkap allagarsiassaanik taassumalu allagaanik ammaallutillu matuseqqittassapput tigummigallakkamut isertortukkut eqqussisinnaaneq taassumangaanniillu annissisinnaaneq akornuserniarlugit. Tamannali pinngitsoorneqarsinnaavoq pisuni ataasiakkaani torersaarnissap isumannaatsuunissallu attatiinnarnissaat pingaartillugu tamanna isumannaatsuusorinartillugu. Ammaaneq matuseqqinnerlu tigummigallagaq isigitillugu pisassapput, atuaanissaq pillugu aalajangiisoqarsimassanngippat, tak. imm. 2.

Imm. 2. Tigummigallakkamut allakkanik taassumalu allagaanik atuaaneq § 55-imi pisut taaneqartut saniatigut aatsaat pisinnaavoq isertitsisarfinmi torersaarnissamut aamma isumannaatsuunissamut tunngasut tamanna pisariaqartissapassuk.

Imm. 3. Politiit allakkanik unitsitsiumappata, unitsitsinissaq ingerlaannaq eqqartuussivimmut aalajangiiffigisassanngortitaassaq.

Imm. 4. Allakkat imm.1 malillugu misissorneqarpata unitsinneqaratilli tigummigallagaq atuaanissamik aalajangiisoqarneranik kalerrinneqassaaq. Kalerrinissarli sap.akunnerini sisamat angullugit pinngitsoorneqarsinnaavoq atuaanissamik siunertarisat maangaannannginnissaat pissutigalugu.

Imm. 5. Atuaanissamik aalajangernermit pissutigisat inernerisaalu allakkiarineqartassapput. Aammattaaq allakkiami takuneqarsinnaassaaq inuup aalajangiinermi pineqartup politimesterimut naammagittaalliorsinnaaneraniq ilisimatinneqareersimanera.

§ 54. Tigummigallakkat allaffissanut pappialanut, puussaannut frimærkinullu aningaasartuutit akilertassavaat, taamaattoq tak. § 60. Tigummigallakkat aningaasanik namminneq aqutassaminnik tunineqaratilluunniit namminneq sulinerikkut isertitaqarneq ajortut, pisortaniit pilersuutitut atugassinneqartassapput, imaluunniit pissutsit allat immikkut ittut pisariaqartitsissappata allaffissanik puussaannillu tunineqartassapput isertitsisarfiup naqissutaa mærkialu atorngit.

Imm. 2. Allakkat pissutissaqanngitsumik kinguarsaanani isumagineqartassapput. Tigummissat piffissamik pisarnertut allakkanik nassitsiviusartumik ilisimatinneqassapput.

§ 55. Tigummigallagaq pisinnaatitaavoq eqqartuussivimmut, illersuisiminut, inatsisinik atoritsinermut ministerimut, Danmarkimi pinerluttunik isumaginnittoqarfiup pisortaanut, Folketingip Ombudsmandianut aamma Inatsisartut Ombudsmandiannut misissugassaannngitsunik allaffigeqatiginnittarnissamut, tak. eqqartuussisarnermik inatsimmi § 380.

Imm. 2. Pisortaqarfiit imm. 1-imi taaneqartut saniatigut tigummigallagaq pisinnaatitaavoq Kalaallit Nunaanni Pinerluttunik Isumaginnittoqarfiup pisortaanik, eqqartuussivinnik, Procesbevillingsnævnmik, politiinik aamma unnerluussisumik, Den Europæiske Menneskerettighedsdomstolmik, Den Europæiske Torturkomitémik FN's Menneskerettighedskommissionimik aamma FN's Torturkomitémik allaffigeqatiginnittarnissamut misissugassaannngitsunik.

Imm. 3. Pisortaqarfiit imm. 1-imi aamma 2-mi taaneqartut saniatigut tigummigallagaq pisinnaatitaavoq pisortaqarfinni oqartussaatanik Folketingimilu taamatullu Inatsisartuni ilaasortanik misissugassaannngitsunik allaffigeqatiginninnissamut.

Imm. 4. Tigummigallagaq nunami allamioq aamma pisinnaatitaavoq nunagisap aallartitaqarfiini konsuleqarfiiniluunniit sinniisuutitanut misissugassaannngitsunik allaffigeqatiginninnissamut, politiit tigummigallaanermi siunertarisat pissutigalugit pissutsillu immikkut illuinnartut tunngavigalugit akerliussanngippata.

§ 56. Pisortaqarfinnut il. il. § 55-imi, imm. 1-imi aamma 2-mi taaneqartunut allakkat ammarneqassanngillat.

Imm. 2. Pisortaqarfinniit imm. 1-imi taaneqartuniit allakkat ammarneqassanngillat, qularinagu isumaqarnarpat allakkat taaneqartutut nassitsisup allagarigai. Ammaasoqassappat tamanna pissaq tigummigallagaq isigitillugu.

§ 57. Pisortaqarfinnut il.il. § 55, imm. 3-mi 4-milu taaneqartunut allakkat ammaannartillugit sulisunut tunniunneqartassapput tigummigallagarlu isigitillugu matuneqarlutik imarisaasa misissoreernerisigut.

Imm. 2. Pisortaqarfinniit imm. 1-imi taaneqartuniit allakkat ammarneqassanngillat, qularinagu isumaqarnarpat allakkat taaneqartutut nassitsisup allagarigai. Ammaasoqassappat tamanna pissaag tigummigallagaq isigitillugu.

Imm. 3. Tigummigallakkap allatigut allaffigeqatigiissutai politiinit misissorneqassatillugit Folketingimi ilaasortanut taamatullu Inatsisartuni ilaasortanut allakkat ikisivigineqartassapput nassuiaatinik. Tamatumunnga atorneqassaaq immersugassaaq Kalaallit Nunaanni Pinerluttunik Isumaginnittoqarfiup pisortaaniit pissarsiarineqartoq.

§ 58. Pisortaqarfinni oqartussaasumut imaluunniit inunntut ataasiakkaanut, tigummigallakkap § 55 malillugu misissugassaanngitsunik allaffigeqatissatut pisinnaatitaaffigisaanut, allakkat pisortaqarfinni oqartussaasumut imaluunniit inunntut ataasiakkaanut atsiugaassapput. Pisortaqarfinni oqartussaasunut allakkat pisortaqarfittut suliffeqarfimmut susassaartumut atsiugaassapput inummut tassani atorfeqartitaasumut nassiusaanatik.

§ 59. Pissutissalimmik qularutigineqassappat allakkat pisortaqarfinni oqartussaasumit il. il. § 55-imi pineqartumit allagaanersut politiit pisortaqarfimmut il. il. tassunga saaffiginnessinnaapput paasiniarlugu allakkat tassanngaanneersuunersut, imaluunniit allakkat nassitsisuusutut taaneqartumut utertitsissinnaallugit uppernarsiniarlugu allakkat taassumanngaanneersuunersut.

Imm. 2. Allakkat tigummigallakkap pisortaqarfinnilu oqartussaasup il. il. akornanni pisut tigummigallakkap § 55 malillugu misissugassaanngitsunik allaffigeqatissatut pisinnaatitaaffigisai atuarneqaratilluunniit unitsinneqartassanngillat, politiinillu qaammartitsivigineqarsinnaallutik isertortukkut eqqussisinnaaneq akornuserniarlugu.

§ 60. Politiit pappialat allaffissat puussaallu tunniuttassavaat frimærkinullu aningaasartuut akilerlugu § 55-imi pisortaqarfinnut il. il. allakkanut tunngatillugu.

Eqqartuussaanikkut pineqaatissitat allaffigeqatiginnittarnerat

§ 61. Eqqartuussaanikkut pineqaatissitaq pisinnaatitaavoq §§ 62-66-ip nassatarisaanik killilimmik allaffigeqatigiittarnissamut. Politiit eqqartuussivik aalajangiinngikkaluartoq eqqartuussanut taakkunangallu allakkanik ammaallutillu matusisinnaatitaapput. Tamanna nalinginnaasumik pisassaaq eqqartuussaasimasooq isigitillugu.

§ 62. Politiit eqqartuussamut tassanngaanniillu allakkanik ammaallutillu matusisassapput isertortumik eqqussinissaq annissinissarlunniit akornuserniarlugit, taamaattoq tak. imm. 3. Taannali sanioqqunneqarsinnaavoq pisuni ataasiakkaani torersaarnissap isumannaatsuunissallu attatiinnarnissaat tunngavigalugu illersorneqarsinnaasorinaraangat.

Imm. 2. Eqqartuussamut tassanngaanniillu allakkanik ammaallunilu matusineq eqqartuussap isiginerani pisassapput, atuaanissaq pillugu aalajangiisoqarsimassanngippat.

Imm. 3. Eqqartuussaanikkut pineqaatissitat pisinnaatitaapput misissuiffigineqanngitsumik allaffigeqatiginninnissamut inatsisinik atortitsinermut ministerimik, Danmarkimi pinerluttunik isumaginnittoqarfiup pisortaanik, Kalaallit Nunaanni pinerluttunik isumaginnittoqarfiup pisortaanik, eqqartuussivinnik, Den Særlige Klageret-imik, Procesbevillingsnævnic, unnerluussisuutitanik aamma politiinik, Folketingip Ombudsmandianik, Inatsisartut Ombudsmandiannik, Folketingimi ilaasortanik, Inatsisartuni ilaasortanik, Den Europæiske Menneskerettighedsdomstol-imik, Den Europæiske Torturkomité-mik, FN's Menneskerettigheds-kommission-imik, FN's Torturkomité-mik aamma illersuisimik advokatimilluunniit akuerisamik, pinerlunnermik suliassami isertitsivimmut isertitaanermik kinguneqartumi, imaluunniit

pinerlunnermik suliassami suli ingerlasumi illersuisussatut ivertitaasimasumik pineqartumilluunniit toqqagaasimasumik, tak. pinerluttulerinermik inatsimmi § 218.

§ 63. Eqqartuussatut pineqaatissitamut taassumannaanniillu allakkanik atuaanissaq aatsaat pisinnaavoq isertitsisarfimmi torersaarnissamut aamma isumannaatsuunissamut tunngasut eqqarsaatigalugit politiit tamanna pisariaqarsorippassuk imaluunniit inatsisinik unioqqutitsinikkut eqqorneqartoq illersorniarlugu, tak. pinerluttulerinermik inatsimmi § 217, imm. 3.

Imm. 2. Allakkanik atuaanissaq pinerluttulerinermik inatsimmi § 217, imm. 4, tak. imm. 3, malillugu atuaasoqassagaangat eqqartuussaq tamatuminnga ilisimatinneqartassaaq. Taamaattorli ilisimatitsinissaq sap. akunneri sisamat angullugit pinngitsoorneqarsinnaavoq ilisimatitsinikkut atuaarniarnerit maangaannarsinnaammata.

§ 64. Atuaasoqarsimatillugu allakkat politiit aalajangiinerat malillugu unitsinneqarsinnaapput torersaarnissakkut isumannaatsuunissakkullu pingaartitassat imaluunniit inatsisinik unioqqutitsinikkut eqqorneqartup illersorniarnissaa pillugit nassiuttariaqassanngippata.

Imm. 2. Allakkat tigusat imm. 1-imi taaneqartut pissutigalugit tunniunneqarsinnaanngitsut utertinneqartassapput. Taamaattorli allakkat tigungmiinnarneqarsinnaapput isumannaatsuunissaq eqqarsaatigalugu tamanna pisariaqarsorinassappat.

Imm. 3. Nassitsisuuq allakkanik tigungminninnermik ilisimatinneqartassaaq. Taamaattorli ilisimatitsinissaq sap. akunneri sisamat angullugit pinngitsoorneqarsinnaavoq tigungminninnermi siunertarisat maangaannarsinnaammata.

§ 65. Allakkanik atuaanissaq, tigungminninnissaq nassitsisumullu utertitsinissaq pillugit aalajangiisoqaraangat tamatumunnga pissutigisat atuaanerullu inenera allakkiarineqartassapput. Aamma allakkiami takuneqarsinnaassaaq, inuup aalajangiinnermi pineqartup ilisimatinneqarnera aalajangiinerup politimesterimut naammagittaalliuutaanissaanut periarfissaqarneranik kimullu tunniunnissaanik.

§ 66. Allakkat tigungmiinnarneqartussat politiinit toqqortarineqartassapput.

Oqarasuaatitigut oqaloqatigiinnerit

§ 67. Allaffigeqatigiinneq aqutugalugu attaveqarfeqarnissaq annertuumik kinguarsaataalluni utaqqinneqarsinnaanngippat, tigungmigallagaq eqqartuussarluunniit akuerineqarsinnaavoq oqarasuaatitigut oqaloqateqarnissamut, taamaattoq tak. imm. 2-5.

Imm. 2. Tigungmigallakkap oqaloqateqarnissaa politiit itigartitsissutigisinnaavaat pineqartup siunertarisaa pissutigalugu, imaluunniit tamanna pisariaqarsorinassappat torersaarnissaq isumannaatsuunissarlu pillugit.

Imm. 3. Eqqartuussap oqaloqateqarnissaa politiit itigartitsissutigisinnaavaat torersaarnissakkut isumannaatsuunissakkullu pingaartitassat imaluunniit inatsisinik unioqqutitsinikkut eqqorneqartup illersorniarnissaa pillugit.

Imm. 4. Oqarasuaatitigut oqaloqatigiinnerit politiinit tusarnaarneqarlutilluunniit isertortumik naalaarneqartassapput eqqartuussivik aalajangiinnikkaluartoq, tamanna imm. 2-mi 3-milu taaneqartut pissutigalugit pisariaqarsorinassanngippata. Oqarasuaatitigut oqaloqatigiinneq tusarnaarneqarpat imaluunniit isertortumik naalaarneqarpat oqaloqatigiittut tamatuminnga siuningaaniit ilisimatinneqassapput. Tusarnaarnissamik imaluunniit isertortumik naalaarnissamik aalajangiineq politiit aalajangiinerissavaat.

Imm. 5. Oqarasuaatitigut oqaloqatigiinnerni, tusarnaarneqarlutilluunniit isertortumik naalaarneqartussani, piumasaqaataasinnaavoq oqaloqatigiinnerup oqaatsit tusarnaartup imaluunniit naalaartup paasisinnaasai atorlugit pissasoq. Pissutsit pisariaqartitsissappata oqalutsimik atuisoqarsinnaavoq.

§ 68. Illersuisimik oqarasuaatikkut oqaloqateqarnissamik qinnuteqaatit nalinginnaasumik akuerineqartartussaapput.

Imm. 2. Tigummigallakkap illersuisimik oqaloqateqarneri tusarnaarneqaratillu isertortumik naalaarneqartussaangillat.

Imm. 3. Eqqartuussaaniikkut pineqaatissitat pisortaqaarfinnik § 62, imm. 3-mi taaneqartunik oqaloqateqarneri tusarnaarneqaratillu isertortumik naalaarneqartussaangillat.

§ 69. Tigummigallakkat oqarasuaatitigut oqaloqatiginninneri kipitinneqarsinnaapput tamanna pisuni ataasiakkaani torersaarnissakkut isumannaatsuunissakkullu pingaartitassat pisariaqartippassuk, imaluunniit tamanna tigummigallaanermut akerliussappat.

Imm. 2. Eqqartuussaaniikkut pineqaatissitat oqarasuaatitigut oqaloqatiginninneri kipitinneqarsinnaapput tamanna pisuni ataasiakkaani torersaarnissakkut isumannaatsuunissakkullu pingaartitassat pisariaqartippassuk, imaluunniit tamanna inatsisinik unioqqutitsinikkut eqqorreqartup illersorniarnissaa pissutigalugu pisariaqarsorinarpat, taamaattoq tak. § 68, imm. 3.

§ 70. Politiit tigummigallakkap oqarasuaatitigut oqaloqateqartarnissamut pisinnaatitaaffiisa naammassiniarnissaat sumiiffinni ataasiakkaani pissutsit tunngavigalugit erseqqinnerusumik aalajangersinnaavaat ilanngullugit oqaloqateqartarnerit qanoq akulikitsigisumik qanorlu sivistigisumik pisarnissaat tamatumani sulisutigut tusarnaarnissamut imaluunniit isertortumik naalaarnissamut isumalluutissat aamma eqqarsaatigalugit.

Aviisinik, atuakkanik il. il. atuarsinnaatitaanerit

§ 71. Isertitat periarfissitaassapput aviisinik atuarnikkut aamma radiukkut fjernsynikkullu aallakaatitanik il. il. malinnaanikkut paasisassarsiortarnissamut.

Imm. 2. Isertitat pisinnaatitaasariaqarput pisortat atuagaateqarfii aqqutigalugit atuakkanik atuagassianillu atorniartarnissamut.

Tusagassiuutinut attaveqarneq

§ 72. Isertitsivimmiittut pisinnaatitaapput tusagassiuutini oqaaseqaateqarnissamut aamma tamatumunnga atasumik assilisittarnissamut, taamaattoq tak. imm. 2.

Imm. 2. Imm. 1 atuutissangilaq tigummigallakkanut eqqartuussiviup aalajangiinera malillugu kisimiititaallutik immikkoortitaasunut.

§ 73. Politiit tigummigallaanerup siunertarisaa tunngavigalugu tigummigallagaasup tusagassiuutitigut oqaaseqaateqarnissaa tamatumunngalu atasumik assilisinnissaa akerliuffigisinnaavaat.

§ 74. Isertitap tusagassiuutitigut oqaaseqaateqarsinnaanera tamatumunngalu atasumik assilisinnissanaanera politimesterimit killiliiffigineqarsinnaavoq isumannaatsuunissakkut imaluunniit eqqartuussiviup aalajangigaanik ersarissumik asissuiniarnerup akiorniarnissaa tamatumunnga pisariaqartitsissappata.

Imm. 2. Killiliissut atortinneqartassaaq pingaartumik isertitat tv-kkut aallakaatitassiani peqataassatillugit tamatumunngalu atatillugu pinerluutigisatik pillugit oqaaseqaateqassatillugit.

Kapitali 7

Isertitanut akuliuffiginnittarneq

Isertitsisarfiit ineerartaannik il. il. misissuiffiginnittarneq

§ 75. Pinerluttunik isumaginnittoqarfiup isertitsiviinut isertitanik ineeqqanillu isersimaffigisanik misissuiffiginnittarneq pillugu nalunaarummi nr. 1175, 7. december 2009-meersumi (misissuisarneq pillugu nalunaarut) malittarisassat malillugit politiit misissorsinnaavaat isertitaasup isersimaffimmini imaluunniit immi sunik nassataqarnera.

Imm. 2. Misissuiffigisap suaassuseqataanik sulisoqanngippat misissuineq inunnit marlunnit suaassuseqatiginnngisanit ingerlanneqarsinnaavoq.

Nakuuserfiginninneq

§ 76. Politiit sulisuusut tiggummigallakkamut eqqartuussaannikkulluunniit pineqaatissitamut nakuuserfiginnittarneq pillugu politiit sulisuusunut malittarisassiat nalinginnaasut malillugit nakuuserfiginnissinnaatitaapput.

Isumannaajaatit

§ 77. Politiit isertitanut isumannaajaatinik atuisinnaapput, aamma paffequtinik saviminernik, isumannaajaatinik atuisarneq pillugu nalunaarummi nr. 1163, 7. december 2009-meersumi malittarisassat malillugit. Nalunaarummi matumani § 20 taamatulli atuutissaaq.

Kapitali 8

Taarsiissuteqartarneq aamma najugaqarnermut akiliutit

§ 78. Isertitsisarfinni tiggummigallakkat eqqartuussaannikkullu pineqaatissitat ajutoornerit il. il. kingunerisaannut taarsiiffigineqartassapput isertitsisarfinniittunut pensioniniittunullu aamma eqqartuussaannikkut pineqaatissitanut misiligummillu iperagaasunut inuiaqatigiinnik sullissinermi ajutoornerit il. il. kingunerisaattut taarsiissutit pillugit nalunaarummi nr. 1169, 7. december 2009-meersumi malittarisassat malillugit.

§ 79. Eqqartuussaannikkut pineqaatissitaaq, isertitsisarfimmi taassumaluunniit avataani sulisoq akissarsiaqaataasumik imaluunniit pisortaniit pilersuutitut tunineqartartoq, isertitsisarfimmi najugaqarnermut akiliuteqassaaq pinerluttunik isumaginnittoqarfiup inissiisarfiini najugaqarnermut akiliutit pillugit nalunaarummi nr. 1170-imi, 7. december 2009-meersumi malittarisassat malillugit.

Kapitali 9

Naammagittaalliortarneq il. il. aamma atuutilersitsineq

Naammagittaalliornermut malittarisassat il.il.

§ 80. Tigummigallaq imaluunniit eqqartuussaaniikkut pineqaatissitaq pillugu aalajangiinerit imaluunniit pineqarneq pillugu naammagittaalliuutit politimesterimut ingerlatinneqarsinnaapput.

Imm. 2. Politimesterimut naammagittaalliuut kinguartitsigallarnermik kinguneqartussaangilaq aalajangiiffiginittuusoq imaluunniit politimesteri tamatuminnga aalajangersaasimangippat.

§ 81. Politimesterip aalajangiineri Pinerluttunik Isumaginnittoqarfiup pisortaanut ingerlateqqineqarsinnaapput.

Imm. 2. Pinerluttunik Isumaginnittoqarfiup pisortaanut naammagittaalliuut kinguartitsinermik kinguneqartussaangilaq, aalajangiisuusoq imaluunniit Pinerluttunik Isumaginnittoqarfiup pisortaa tamanna pillugu aalajangersaasimangippat.

§ 82. Tigummigallakkap eqqartuussisarnermik inatsimmi § 379, imm. 1, malillugu piumasarisinnaavaa politiit pulaarnissamut itigartitsinerat imaluunniit pulaartup misissuiffiginissaanik piumasaqataat eqqartuussivimmut aalajangiiffigisassanngortitaassasoq.

§ 83. Politiit tigummigallakkamut taassumannaanniillu allakkanik tigumminniinnarnissaannik apeqqut eqqartuussisarnermik inatsimmi § 380 malillugu ingerlaannaq eqqartuussivimmut aalajangiiffigisassanngortitaassaaq.

§ 84. Tigumminnikkallarnermi siunertarisat tunngavigalugit tigummigallakkap pisinnaaffiini allatigut killiliisoqarnissaanik politiit aalajangiippata, tigummigallagaq eqqartuussisarnermik inatsimmi § 381, imm. 1, malillugu piumasaqarsinnaavoq tamanna eqqartuussivimmut aalajangiiffigisassanngortitaassasoq.

§ 85. Tigummigallarnernermi pineqarnerit pillugit naammagittaalliuutit eqqartuussivimmut tunniunneqarsinnaapput eqqartuussisarnermik inatsimmi § 381, imm. 2, malillugu.

Atuutilersitsineq

§ 86. Nalunaarut atuutilissaaq 15. april 2010.

Kalaallit Nunaanni Politimesteri, ulloq 29. marts 2010

BJØRN TEGNER BAY
KST.